

NOOR MOHAMAD SHAKIL HAMEED



Tangani kemaruk pingat palsu

LANGKAH kerajaan menggubal Rang Undang-undang Kesalahan Yang Berhubungan Dengan Anugerah 2016 wajar disokong oleh semua pihak. Langkah ini cukup signifikan bagi menangani kes-kes melibatkan anugerah kebesaran palsu yang berlarutan sejak bertahun-tahun lamanya.

Rang undang-undang itu yang dibacakan untuk kali pertama dalam sidang Dewan Rakyat baru-baru ini mencadangkan individu yang disabitkan kesalahan melibatkan penerimaan dan penggunaan anugerah kebesaran tidak diiktiraf boleh dipenjara sehingga tiga tahun. Hukuman denda maksimum RM10,000 atau penjara tidak lebih tiga tahun atau kedua-duanya sekali turut dicadangkan bagi individu yang disabitkan kesalahan lain yang berkaitan seperti menghadiri istiadat pengurniaan serta membuat atau memiliki lambang kebesaran. Turut menjadi kesalahan adalah perbuatan menerima dan menggunakan anugerah asing daripada ketua negara yang tidak diiktiraf.

Rang undang-undang itu juga menetapkan, setiap warganegara kecuali raja-raja dan permaisuri serta Yang Dipertua Negeri dan pasangan mereka hendaklah mendapatkan kebenaran bertulis Yang di-Pertuan Agong sebelum menerima anugerah asing. Individu yang disabit-

kan kesalahan menerima dan menggunakan anugerah asing tidak diiktiraf boleh didenda tidak melebihi RM500,000.

Penulis melihat ini adalah satu langkah pencegahan yang cukup komprehensif dan wajar dikuatkuasakan dengan segera memandangkan terlalu banyak kontroversi tercetus berkaitan isu anugerah dan pingat palsu sehingga mengelirukan dan membimbangkan masyarakat. Antara yang masih segar dalam ingatan kita ialah, melibatkan beberapa individu yang mengaku 'Sultan Melaka', wanita tukang urut mendakwa sebagai 'Raja Kerinchi Tinggi Sumatera,

Indonesia atau Bonda Ratu, Kesultanan Sulu yang dianugerahkan oleh Jamalul Kiram III, keturunan Naning dan Raja Sukakata, Paku Buwono XII. Lebih teruk lagi apabila ada individu yang sanggup membayar sehingga RM100,000 semata-mata untuk mendapatkan pelbagai gelaran seperti 'Datuk Seri' daripada pihak-pihak yang tidak diiktiraf itu.

Kita berharap agar mereka yang kemaruk gelaran ini akan insaf dan sedar. Sedarlah betapa gelaran palsu itu tidak akan bertahan lama. Lambat laun pihak berkuasa dapat hidu juga asal usulnya. Biarlah pangkat, kedudukan, kuasa dan gelaran itu datang mencari kita.

Walaupun pendedahan demi pendedahan dibuat termasuk secara eksklusif oleh akhbar ini namun dilihat masih ramai yang kemaruk gelaran dan sanggup buat apa saja untuk mendapatkan pengiktirafan palsu seperti ini. Ini menyebabkan muncul terlalu banyak sindiket yang cuba mengambil kesempatan dan memperdaya mangsa yang kelihatan cukup terdesak ini.

Hakikatnya masyarakat cukup terkejut apabila pihak media mendedahkan begitu banyak sindiket yang melakukan aktiviti jual beli gelaran palsu ini beroperasi di negara kita sekaligus mengaut keuntungan yang cukup besar. Apa yang pasti sekarang akibat kegiatan seperti ini masyarakat sudah mula sangsi dan keliru dengan pelbagai gelaran yang dimiliki oleh sesetengah individu di negara ini adakah gelaran itu sah atau palsu.

Penulis melihat isu jual beli gelaran palsu dan juga lambakan gelaran ini berpunca daripada dua faktor utama iaitu pertama, wujudnya sindiket terancang yang memanipulasi pihak tertentu untuk mengaut keuntungan dengan melakukan urusan jual beli gelaran palsu. Faktor kedua pula berpunca daripada tindakan beberapa individu yang tampil mengaku diri sebagai sultan dan juga kerabat diraja yang tidak pernah diiktiraf oleh pihak kerajaan yang kemudiannya mula menganugerahkan pelbagai gelaran atas kapasiti diri masing-masing yang diangkat sebagai sultan mahupun raja.

Dalam konteks ini ada dua kemungkinan yang sering berlaku iaitu pertama gelaran itu sememangnya palsu dan sindiket ini menipu individu yang membelinya. Satu lagi senario adalah kemungkinan gelaran itu sah tetapi dianugerahkan secara pintu belakang dengan aktiviti jual beli dan penyelewengan didalangi oleh individu yang mungkin menyalahgunakan kedudukan untuk mengaut keuntungan.

Apapun sesuatu urusan niaga itu tidak akan berlaku andai tidak ada unsur penawaran dan juga permintaan. Menyedaripada hakikat betapa sebilangan rakyat kita agak kemaruk mendapatkan anugerah, penghormatan dan gelaran maka muncul sindiket yang mengambil kesempatan ke atas kelompok ini. Tambahan pula orang yang kemaruk ini sanggup membayar apa jua jumlah bayaran yang dikenakan oleh sindiket ini asalkan matlamat mereka memiliki gelaran itu tercapai. Mereka juga 'tidak berminat' menyiasat sama ada gelaran itu sah mahupun palsu.

Kita berharap agar mereka yang kemaruk gelaran ini akan insaf dan sedar. Sedarlah betapa gelaran palsu itu tidak akan bertahan lama. Lambat laun pihak berkuasa dapat hidu juga asal usulnya. Biarlah pangkat, kedudukan, kuasa dan gelaran itu datang mencari kita.

Bagi yang rasa dirinya ditipu oleh sindiket jual beli gelaran ini serta ragu-ragu dengan gelaran yang diguna pakai selama ini eloklah segera merujuk pihak berkuasa mahupun pihak yang berkenaan untuk tujuan pengesahan. Bayangkan betapa malunya kita kelak andai ada pihak yang mengetahui kita miliki gelaran palsu ataupun tahu kita membeli gelaran tersebut.

Semoga pendedahan demi pendedahan tentang gejala tidak sihat ini akan menyedarkan sesiapa yang mungkin sedang memasang impian untuk mendapatkan gelaran dengan cara yang tidak betul. Kita berharap aktiviti tidak bermoral seperti ini dapat disekat dan dicegah dengan segera. Mudah-mudahan rang undang-undang baharu ini dapat diluluskan dengan segera supaya sindiket ini dapat dipatahkan dan adalah menjadi tanggungjawab bersama untuk kita menjaga dan memelihara imej dan nama baik institusi diraja di negara kita.

PENULIS ialah Ketua Bahagian Hal Ehwal Pelajar Universiti Putra Malaysia (UPM).